

**Sinar Harian**  
**06-Nov-2011**

## Tanda tanya masa depan PTPTN

**SIMPATI dengan nasib Perbadanan Tabung Pendidikan Tinggi Nasional (PTPTN) yang dikhabarkan bercadang untuk memberhentikan pemberian pinjaman perbelanjaan mulai 2013 kepada penuntut disebabkan kekangan kewangan. Pelik juga mengapa PTPTN menghadapi masalah kewangan sedangkan pada masa sama begitu gah mengiklankan kempen pembayaran semula pinjaman di media elektronik, paling menarik disiarkan pada waktu puncak. Timbul tanda tanya, mengapa perlu sampai mengiklankan di televisyen yang tentunya akan memakan belanja puluhan ribu ringgit untuk sekali siaran. Pelik bukan? - HARUAN LAUT**



**KENYATAAN AKHBAR  
PERBADANAN TABUNG PENDIDIKAN TINGGI NASIONAL  
(PTPTN)**

**TANDA TANYA MASA DEPAN PTPTN**

Kenyataan daripada Haruan Laut, melalui akhbar Sinar Harian pada 6 November 2011 adalah dirujuk.

PTPTN sedang memperhalusi cadangan pemberhentian pembiayaan perbelanjaan (sara hidup) pada tahun 2013 dengan melihat dari semua aspek. Cadangan ini juga akan diteliti di peringkat Kementerian Pengajian Tinggi sebelum dibawa untuk kelulusan Jemaah Menteri. Cadangan ini adalah bagi memastikan kelestarian PTPTN memandangkan jumlah tanggungan yang semakin meningkat setiap tahun di samping mengurangkan beban pelajar untuk membuat bayaran balik pinjaman.

Untuk makluman, tujuan Kempen Pembayaran Balik Pembiayaan PTPTN dilaksanakan melalui media massa adalah sebagai medium hebahan kepada masyarakat secara menyeluruh serta meningkatkan kesedaran para peminjam untuk melaksanakan pembayaran balik pinjaman mereka demi menjamin kelangsungan dana pendidikan pada masa hadapan. Tambahan pula, perbelanjaan yang terlibat untuk menyedarkan peminjam tentang tanggungjawab mereka melalui media massa ini adalah munasabah sekiranya dibandingkan dengan jumlah tunggakan yang begitu besar untuk diperolehi.

Sekian, terima kasih.

Rina binti Abd Rahman  
Pegawai Perhubungan Awam, PTPTN